

Gou Caeuq Aensuen Daxdaiq

Laeng ranz daxdaiq bonjlaiz dwg benq diegfzw he, baez daengz fwn doek couh engq mbouj ndei byaij. Daxdaiq coengmingz moix baez loh gvaq cungj lai yawj geij mbat, lumj cingq vehnda aen gunghcwngz hung he. Mwngez yawj, lij caengz gvaq ndaej ndwen he, daxdaiq gvakgvak cingcingj, couh lumj boux canghfapswd ndeu, diegfzw bienqbaenz aen suenbyaek hung he.

Daj aen suenbyaek neix cingj ndei le, gou bae ranz daxdaiq couh engq lai lo.

Ciuggaeuq dwg aen rok de, ciuggaeuq dwg aen bat de, mboujgvaq youq ndaw da gou, gyoengqde couh bienqbaenz “hongdawz cienmonz” gou bae laeng ranz guhhong lo. Daxdaiq caeu doengj raemx he hwnjdaeuq, gou caeuq daxdaiq doxcaez “hihi hoho” ram daengz laeng ranz bae, rwed raemx hawj go’ byaek, gaem aen rok, daek rok raemx he, yungh rengz rwed hwnj gyangmbwn bae: “Fwn doek lo, fwn doek lo!” Gou ndwn youq gwnz roen rin bu baenz haenx faengzfwdfwd, buet bae buet dauq, daengx aensuen cungj dwg sing riugaekgaek gou. Daxdaiq youq henz ndiepgyaez dwk yawj gou, mbouj laengz gou, caih gou faengzfwdfwd rwed raemx guhcaemz.

Daenj haizraemx, daenj madfwngz, cang lumj boux vungzuhnaz nei, gou hainduj ciemz rum lo. Gou maeuq roengzdaeuq, daj baihsuix menhmenh daengq gvaq baihgva. Raen go rum he, gou vaiqviet iet fwngz gvaqbae, fwngz he naenx namh, fwngz he dawz gorum lien rag ciemz hwnj, swnh fwngz vut haeuq rienghmou bae, caih duzmou cawqceq. Gou gamj-daengz swheij lumj boux cien’ gya baet dileiz nei, gij rum couhdwg “dileiz” gou yaek baet haenx. Vihliux mbouj hawj go’ byaek “deng sieng”, gou itdingh baet seuq “dileiz” bae.

Baeg lo, dawz fan mbinj he daeuq, bu youq gwnz dieg, ninz youq gwnz de, cungj miz rumzliengz ci daeuq fifi. Ninz roengzdaeuq cij raen gwnzmbwn geijlai lamz ha, lamz ndaej sawndikndik. Youh miz raq rumz he ci daeuq, gwnzmbwn mbin daeuq geij duj fwj, gij fwj de hix dwg sawcangcang, beij naehau lij hau, ninz youq gwnz de itdingh gig cwxcaih ba!

Suenbyaek daxdaiq ciengxlwenx miz mbungq-mbaj mbin, dujva hai; doihduz byaij youzyet, siengj gwn maz couh gwn; lwgbieng siengj maj geijlai raez couh maj geijlai raez, makyungz siengj bienq geijlai nding couh bienq geijlai nding; swnh fwngz baez



vax, cungj miz doenghyiengh ndei, moeggva, byaekheu, duhnoh……

Doenghbaez bae gip sae, cadi doek raemx; doenghbaez bae mbaet va, cadi loengloh. Ceiq gyaenz yawj gaeqmeh faeg ok gaeqlwg, ceiq gyaenz va’ byaek lajmbanj, yamq din yamq riz he, dujva go’ nywj cungj miz cingzgeih, gou caeuq aensuen daxdaiq, dwg gojgaeq seizi q gou.

(Vuzyangz Lozlinz)

Heiqci Rox Bienq Iq

Ndwen gonq, ranz gou cawx ndaej gyaq ci he, daengx ranz vnz angq raixcaix. Daxboh daiq gou caeuq daxmeh hai ci bae cauhsi cawx doxgaiq, hoeng daxboh hai ci baenq hauilai nanz cij dingz ndaej ci, giz dingz ci liz cauhsi haemq gya. Ma daengz ranz couh engq mazfanz lo, ndaw siujgih hix mbouj miz dieg dingz ci, daxboh cijndei dawz ci dingz youq naj aenlaeuz. Daxmeh raen le naeuz: “Ae, baezneix gyaqci doek mbouj ndaej lo!” Gou baez yawj, naj laeuz laeng laeuz cungj dingz hauilai ci, yienghneix dingz ci caen yingyangj vanzging ndaw siujgih ha! Danghnaeuz heiqci ndaej bienq iq couh ndei lo.

Gou siengj fatmingz cungj heiqci bienq ndaej iq he. Gyoengqvunz cijaeu naenx aen anniuq nding gwnz ci, gyaqci couh rox gag bienq iq, ndaej cuengq haeuq daehbuh bae roxnaeuz gaem youq ndaw fwngz. Mwh gyoengqvunz siengj yungh ci, cijaeu naenx aen anniuq heu gwnz ci, gyaqci couh rox menhmenh bienq hung, bienqbaenz gyaqci cingqciengz yienghneix hung. Miz cungj heiqci yienghneix bienq ndaej hung’ iq, couh caiq hix mbouj yungh yousim gyaqci mbouj miz dieg dingz lo.

Gou aeu aen siengjap neix lwnh daxmeh nyi. Daxmeh haenh gij siengjap gou ndei, mboujgvaq daxmeh lwnh gou yaek ndeindei doegsaw, gaemdawz bonjlingx ak, majhung le cij aiq ndaej saedyienh aen lijsiengj neix.

Gyanghaemh, gou daiq aen siengjmuengh ndei neix ninzndaek lo. Gou loqraen swheij baenz boux canghsezgi ndeu, sezgi ok cungj ci moq bienq ndaej iq he. Gou dawz de guh huqlaex soengq hawj daxboh, daxboh caeuq daxmeh naengh youq ndaw gyaqci gou fatmingz haenx, angqfwngfwng riu dwk, gou hix angqfwngfwng riu dwk.

(it nienzgaep Sunh Bozhanz)



Gijcaen Caeuq Gijloq



Dwglau lai lo! Boh ha. Gou mbouj yaeuh mwngz go! Lwg guh aen loq-fangzhwnz ndeu dahraix——

Doenghgo faexlwg ngoenzlwnz mwngz bae gwnz bya raemj ma guh fwngz dwkfeiz de, bienqbaenz faex-gyaengh raezrangrang rox moeb vnz, lij

rox gangjavah dem. Gyoengqde moeb gou, hozhwnj fofu naeuz:

Daxboh mwngz raemj dou raek bae, Dou hix raemj hwet mwngz raek bae! ……

Dwglau lai lo!

Dwglau lai lo! Beixmbauq ha. Gou mbouj yaeuh beix go! Nuengx guh aen loqfangzhwnz ndeu dahraix——

Geij duz ronghrib ngoenzlwnz mwngz gaeb daeuq coq ndaw bingz de, bienqbaenz duzroegfeiz laux gvaq gou bae, lij rox gangj vah dem. Gyoengqde gaeb gou mbin haeuq ndoeng bae, hozhwnj fofu naeuz:

Beixmbauq mwngz gyaeng dou youq ndaw bingz,

Dou hix gyaeng mwngz haeuq ndaw gamj laepngaungau bae!……

Dwglau lai lo!

Gangjyaeuh

Baezbaez bae gwnz bo yawjraen gova gyaundeide, mwngz vihmaz baezbaez cungj mbaet gaem ndeu dauqma, baek haeuq ndaw bingzgingq bae ne?

Mwngz naeuz, mwngz gyaenz doenghgij va gyaundeide neix.

Mwngz gangjyaeuh! Beixmbauq ha.

Langhnaeuz mwngz gyaenz dahraix, vihmaz euj nyinghva raek bae, hawj de reuqda youq ndaw bingz ne?

Langhnaeuz mwngz goj dwg duj va ndeu, langhnaeuz goj miz vnz mbaet mwngz baek haeuq ndaw bingz bae, mbouj hawj mwngz maj youq ndaw namh, mbouj hawj mwngz gwn raemxraizoux daengngoeng hailangh, yienghneix



dwg gyaenz mwngz ha? Beixmbauq ha.

(Daj《Bonjsei Sim Lwngnyez》(Veiz Gizlinz raiz) senj okdaeuj, Lwg-fwngzmeh/卢奋长 hoiz)